

卷十九

廣文選卷第一

明通議大夫都察院右副都御史大庾劉節廣

天地廣

天地賦

成公子安



惟自然之初載兮道虛無而玄清太素紛以溷淆兮始
 有物而混成何元一之芒昧兮廓開闢而著形爾乃清
 濁剖兮玄黃判離太極既殊是生兩儀星辰煥列日月
 重規以尊地靜以卑昏明迭炤或盈或虧陰陽協
 氣而謝寒暑隨時而推移三才殊性五行異位千變
 萬化育庶類授之以形稟之以氣色表文采聲有音
 無方流形品物鼓以雷霆潤以慶雲八風翱翔

書名 廣文選八十二卷 嘉靖十二年序刊本
 撰者 明 劉節 輯
 卷 卷十九
 內容分類 集-總集-詩文
 索書號 大木-集部-總集類-3
 編號 D7920300

彩色首頁

東洋文化研究所漢籍目錄 編號: D7920300

東洋文化研究所漢籍目錄所藏漢籍善本文影像資料庫 索書號: 大木-集部-總集類-3

漢籍善本文影像資料庫文本 廣文選八十二卷 嘉靖十二年序刊本

版權所有: 東京大學 東洋文化研究所

使用上的注意事項

明通議大夫都察院右副都御史大庾劉節廣

詩

樂府二

蝶蝶行

古辭

蝶蝶之遨遊東園奈何卒逢三月養子燕接我苜蓿間
持之我入紫深宮中行纏之傳樽櫺間雀來燕燕子見
啣哺來搖頭鼓翼何軒奴軒

前緩聲歌

水中之馬必有陸地之船但有意氣不能自前心非木
石荆根株數得覆蓋天當復思東流之水必有西上之
魚不在大小但有朝於復來長笛續短笛欲今皇帝陛

下三千萬

東光

東光平蒼梧何不平蒼梧多腐粟無益諸軍糧諸軍遊
蕩子早行多悲傷

城上烏

城上烏尾畢通公爲吏子爲徒一徒死百乘車車班班
入河間河間姪女工數錢爲室金爲堂石上慊慊春黃
梁梁下有懸鼓我欲擊之丞卿怒

鷄鳴

鷄鳴高樹巔狗吠深宮中蕩子何所之天下方太平刑
法非有貸柔協正亂名黃金爲君門碧玉爲軒堂上有
雙樽酒作使邯鄲倡劉王碧青壁後出郭門王金後有
方池池中雙鴛鴦鴛鴦七十二四列自成行鳴聲何啾
啾聞我殿東廂兄弟四五人皆爲侍中郎五日一時來
觀者滿路旁黃金絡馬頭頰頰何煌煌桃生露井上李
樹生桃旁蟲來齧桃根李桃代桃疆樹木身相代兄弟
還相忘

烏生

烏生八九子端坐秦氏桂樹間惜我秦氏家有遊遨蕩
子工用睢陽疆蘇合彈左手持疆彈兩丸出入烏東西
惜我一丸卽發中烏身烏死魂魄飛揚上天阿母生烏
子時乃在南山崑石間惜我人民安知烏子處蹊徑窈
窕安從通白鹿乃在上林西苑中射工尙復得白鹿脯
惜我黃鵠摩天極高飛後宮尙復得烹之鯉魚乃在洛

水深淵中鈎鈎尚得鯉魚口惜我人民生各各有壽命
死生何須復道前後

王子喬

王子喬參駕白鹿雲中遨參駕白鹿雲中遨下遊來王
子喬參駕白鹿上至雲戲遊遨上建通陰廣里踐近高
結仙宮過謁三台東遊四海五嶽上過蓬萊紫雲臺三
王五帝不足令令我聖朝應太平養民若子事父明當
究天祿求康寧玉女羅坐吹笛簫嗟行聖人遊八極鳴
吐銜福翔殿側聖主享萬年悲吟皇帝延壽命

董逃行

吾欲上謁從高山山頭危險道路難遙望五嶽端黃金
為關班璘但見芝草葉落紛紛解一百鳥集來如烟山獸

紛綸麟辟邪其瑞鷓鴣聲但見山獸援戲相拘攀解二

復前行玉堂未心懷流還傳教出門來門外人何求所

言欲從聖道求一得命延解三教敕凡吏受言採取神藥

若木端白兔長跪搗藥蝦蟆丸奉上陛下一玉杵服此

藥可得神仙解四服爾神藥莫歡喜陛下長生老壽四面

蕭蕭稽首天神擁護左右陛下長與天相保守解五

西門行

出西門步念之今日不作樂當待何時解一夫為樂為樂

當及時何能坐愁悒鬱當復待來茲解二飲醇酒炙肥牛

請呼心所歡可用解愁憂解三人生不滿百常懷千歲憂

晝短苦夜長何不秉燭遊解四自非仙人王子喬計會壽

命難與期自非仙人王子喬計會壽命難與期解五人壽

非金石年命安可期貪財愛惜費但爲後世嗤六解

東門行

出東門不顧歸來入門帳欲悲盎中無斗儲還視桁上
無懸衣一拔劍出門去兒女牽衣啼他家但願富貴賤
妾與君共舖糜二解共舖糜上用滄浪天故下爲黃口小
兒今時清廉難犯教言君復自愛莫爲非三解今時清廉
難犯教言君復自愛莫爲非行吾去爲遲平慎行望君

歸四解

蒲歌行

爲樂未幾時遭世險巖逢此百罹伶丁荼毒愁苦難爲
遙望極辰天曉月移憂來填心誰當我知一解戚戚多思
慮耿耿殊不寧禍福無形惟念古人遜位躬耕遂我所
願以茲自寧自鄙摟摟守此未榮二解暮秋烈風昔蹈滄
海心不能安攬衣瞻夜北斗闌干星漢照我去自無他
奉事二親勞心可言三解窮達天爲智者不愁多爲少憂
安貧樂道師彼莊周遺名者貴子遐同遊往者二賢名
垂千秋四解飲酒歌舞樂復何須照視日月日月馳驅轉
軻人間何有何無貪財惜費此一何愚鑿石見火居代
幾時爲當權樂心得所喜安神養性得保遐期

筮篔引

公無渡河公竟渡河墮河而死當奈公何

枯魚過河泣

枯魚過河泣何時悔復及作書與魴鱉相交慎出入

獨漉篇

獨漉獨漉水深泥濁泥濁尚可水深殺我雍雍雙鴈遊
戲田畔我欲射鴈念子孤散翩翩浮萍得風搖輕我心
何合與之同并空牀低帷誰知無人夜衣錦繡誰別偽
真刀鳴削中倚牀無施父冤不報欲活何為猛虎班班
遊戲山間虎欲齧人不避豪賢

善哉行

來日大難口燥唇乾今日相樂皆當喜歡解一經歷名山
芝草翻翻仙人王喬奉藥二丸解二自惜袖短內手知寒
慚無靈轍以報道趙宣三月沒參橫北斗闌干親交在
門飢不及殮四歡日尚少戚日苦多以何忘憂彈箏酒
歌五淮南八公要道不煩參駕六龍遊戲雲端六解

白鳩篇

翩翩白鳩載飛載鳴懷我君德來集君庭白雀呈瑞素
羽翩翩翔庭舞翼以應仁乾交交鳴鳩或丹或黃樂我
君惠振羽來翔東壁餘光魚在江湖惠而不費敬我微
軀策我良駟習我馳馳與君周旋樂道亡餘我心虛靜
我志霑霑彈琴鼓瑟聊以自娛凌雲登臺浮遊太清板
龍附鳳目望身輕

怨詩行

天德悠且長人命一何促百年未幾時奄若風吹燭嘉
賓難再遇人命不可續齊度遊四方各繫太山錄人間
樂未央忽然歸東嶽當須盪中情遊心恣所欲

艷歌行

翩翩堂前燕冬藏夏來見兄弟兩三人流宕在他縣故

衣誰當補新衣誰當綻賴有賢主人覽取為吾組夫婿
從門來斜柯西北眇語卿且勿眇水清石自見石見何
纍纍遠行不如歸

南山石嵬嵬松栢何離離上枝拂青雲中心十數圍洛
陽發中梁松樹竊自悲斧鋸截是松松樹東西摧特作
四輪車載至洛陽宮觀者莫不嘆問是何山林誰能刻
鏤此公輸與魯班被之用丹漆薰用蘇合香本自南山
松今為宮殿梁

艷歌何嘗行

飛來雙白鵠乃從西北來十五五羅列成行一解妻卒
被病行不能相隨五里一反顧六里一徘徊二解吾欲嚙
汝出口噤不能開吾欲負汝去毛羽何摧頽三解樂哉新
相知憂來生別離躊躇顧群侶淚下不自知四解念與君
離別氣結不能言各各重自愛遠道歸還難妾當守空
房閉門下重關若生當相見亡者曾黃泉今日樂相樂
萬歲期延年

白頭吟

皚如山上雪皎如雲間月聞君有兩意故來相訣絕一解
平生共城中何嘗斗酒會明日溝水頭蹀躞御溝上溝
水東西流二解郭東亦有樵郭西亦有樵兩樵相推與無
親為誰驕三解淒淒重淒淒嫁娶亦不啼願得一心人白
頭不相離四解竹竿何嫋嫋魚尾何離離男兒欲相知何
用錢刀為齒如如字或下馬噉箕川上高士嬉今日相
對樂延年萬歲期

相逢行

相逢狹路間道隘不容車不知何年少夾轂問君家君
家誠易知易知復難忘黃金爲君門白玉爲君堂堂上
置樽酒作使邺鄆倡中庭生樹桂華燈何煌煌兄弟兩
三人中子爲侍郎五日一來歸道上自生光黃金駱馬
頭觀者盈道旁入門時左顧但見雙鴛鴦七十二羅列
自成行音聲何噦噦鶴鳴東西廂大婦織綺羅中婦織
流黃少婦無所爲挾瑟上高堂丈人且安坐調絃方未
央

長安有狹斜行

長安有狹斜狹西不容車適逢兩少年夾轂問君家君
家新市旁易知復難忘太子二千石中子孝廉郎小子
無官職衣冠仕洛陽三子俱入室室中自生光大婦織
綺紵中婦織流黃小婦無所爲挾瑟上高堂丈人且徐
徐調絃詎未央

隴西行

天上何所有歷歷種白榆桂樹夾道生青龍對道隅鳳
凰鳴啾啾一母將九雛顧視世間人爲樂甚獨殊好婦
出迎客顏色正敷腴伸腰再拜跪問客平安否請客北
堂上坐客氍毹能清白各異樽酒上正萃疏酌酒持與
客客言主人持却略再拜跪然後持一盃談笑未及竟
左顧敕中厨促令辦麤飯慎莫使稽留廢禮送客出盈
盈府中趨送客亦不遠足不過門樞取婦得如此齊姜
亦不如健婦持門戶亦勝一丈夫

飛鵠行

飛來雙白鵠乃從西北來十十將五五羅列行不齊忽
然卒疲病不能飛相隨五里一反顧六里一徘徊吾欲
啣汝去口噤不能開吾欲負汝去羽毛日摧頽樂哉新
相知憂來生別離踟躕顧羣侶泪落縱橫垂今日樂相
樂延年萬歲期

陌上桑

日出東南隅照我秦氏樓秦氏有好女自名為羅敷羅
敷喜蠶桑採桑城南隅青絲為籠繫桂枝為籠鉤頭上
倭墮髻耳中明月珠細綺為下裙紫綺為上襦行者見
羅敷下擔捋髭鬚少年見羅敷脫帽著幘頭耕者忘其
犁鋤者忘其鋤來歸相怒怨但坐觀羅敷解使君從南
來五馬立踟躕使君遣吏往問是誰家姝秦氏有好女

自名為羅敷羅敷年幾何二十尚不足十五頗有餘使

君謝羅敷寧可共載不羅敷前致辭使君一何愚使君

自有婦羅敷自有夫二解東方千餘騎夫婿居上頭何用

識夫婿白馬從驪駒青絲繫馬尾黃金駱馬頭腰中鹿

盧劍可直千萬餘十五府小史二十朝大夫三十侍中

郎四十專城居為人潔白皙鬢鬢頗有鬚盈盈公府步

冉冉府中趨坐中數千人皆言夫婿殊三解

羽林郎

辛延年

昔有霍家奴姓馮名子都依倚將軍勢調笑酒家胡胡
姬年十五春日獨當壚長裾連理帶廣袖合歡襦頭上
藍田玉耳後大秦珠兩鬟何窈窕一世良所無一鬟五

百萬兩鬢千萬餘不意金吾子娉婷過我廬銀鞍何煜
燭翠蓋空躊躇就我求清酒絲繩提玉壺就我求珍殺
金盤鱠鯉魚貽我青銅鏡結我紅羅裾不惜紅羅裂何
論輕賤軀男兒愛後婦女子重前夫人生有新故貴賤
不相踰多謝金吾子私愛徒區區

江南

江南可採蓮蓮葉何田田魚戲蓮葉間魚戲蓮葉東魚
戲蓮葉西魚戲蓮葉南魚戲蓮葉北

冉冉孤生竹

冉冉孤生竹結根泰山阿與君爲新婚兔絲附女蘿兔
絲生有時夫婦會有宜千里遠結婚悠悠隔山陂思君
令人老軒車來何遲傷彼蕙蘭花含英揚光輝過時而
不采將隨秋草萎亮君執高節賤妾亦何爲

平陵東

平陵東松柏桐不知何人劫義公劫義公在高堂下交
錢百萬兩走馬兩走馬亦誠難顧見追吏心中側心中
側血出漉歸告我家賣黃犢

淮南王篇

淮南王自言尊百尺高樓與天連後園鑿井銀作牀金
甌素綆汲寒漿汲寒漿飲少年少年窈窕何能賢揚聲
悲歌音絕天我欲渡河河無梁願化雙黃鵠還故鄉還
故鄉入故里徘徊故鄉苦身不已繁舞寄聲無不泰徘
徊桑梓遊天外

長歌行

仙人騎白鹿髮短耳何長導我上大華攬芝獲赤幢來
到主人門奉藥一玉箱主人服此藥身體一日康疆髮
白更黑延年壽命長峇峇山上亭皎皎雲間星遠望使
心思遊子戀所生驅車出北門遙觀洛陽城凱風吹長
棘天天枝葉傾黃鳥飛相追咬咬美音聲竚立望西河
泣下沾羅纓

悲歌

悲歌可以當泣遠望可以當歸思念故鄉鬱鬱纍纍欲
歸家無人欲渡河無船心思不能言腸中車輪轉

折楊柳

默默施行違厥罰隨事來妹喜殺龍逢桀放於鳴條解一
祖伊言不用紂頭懸白旄指鹿用為馬胡亥以喪軀解二

夫差臨命絕乃云負子胥戎王納女樂以亡其由余璧

馬禍及號二國俱為墟解三三夫成市虎慈母投杼趨下

和之則足接輿歸草廬解四

焦仲卿妻

古辭

孔雀東南飛五里一徘徊十三能織素十四學裁衣十

五彈箜篌十六誦詩書十七為君婦心中常苦悲君既

為府吏守節情不移鷄鳴入機織夜夜不得息三日斷

五疋大人故嫌遲非為織作遲君家婦難為妾不堪驅

使徒留無所施便可白公姥及時相遣歸府吏得聞之

堂上啓阿母兒已薄祿相幸復得此婦結髮同枕席黃

泉共為友共事二三年始爾未為久女行無偏斜何意

致不厚阿母謂府吏何乃太區區此婦無禮節舉動自

專由吾意久懷忿汝豈得自由東家有賢女自名秦羅敷可憐體無比阿母爲汝求便可速遣之遣去慎莫留府吏長跪告伏惟啓阿母今若遣此婦終老不復取阿母得聞之槌牀便大怒小子無所畏何敢助婦語吾已失恩義會不相從許府吏默無聲再拜還入戶舉言謂新婦哽咽不能語我自不驅卿逼迫有阿母卿但暫還家吾今且報府不久當歸還還必相迎取以此下新意慎勿違吾語新婦謂府吏勿復重紛紛往昔初陽歲謝家來貴門奉事循公姥進心敢自專晝夜勤作息伶俜縈苦辛謂言無罪過供養卒大恩仍更被驅遣何言復來還妾有繡腰襦葳蕤自生光紅羅複斗帳四角垂香囊箱簾六七十綠瑱青絲繩物物各自異種種在其中人賤物亦鄙不足迎後人留待作遣施於今無會因時時爲安慰父父莫相忘鷄鳴外欲曙新婦起嚴妝著我繡袂裙事事四五通足下躡絲履頭上玳瑁光腰若流紈素耳著明月璫指如削葱根口如含朱丹纖纖作細步精妙世無雙上堂謝阿母母聽去不止昔作兒女時生小出野里本自無教訓兼愧貴家子受母錢帛多不堪母驅使今日還家去念母勞家裏却與小姑別濺落蓮珠子新婦初來時小姑如我長勤心養公姥好自相扶將初七及下九嬉戲莫相忘出門登車去涕落百餘行府吏馬在前新婦車在後隱隱何甸甸俱會大道口下馬入車中低頭共耳語誓不相隔卿且暫還家去吾今且赴府不久當還歸誓天不相負新婦謂府吏感君

區區懷君既若見錄不久望君來君當作磐石妾當作蒲葦蒲葦紉如絲磐石無轉移我有親父兄性行暴如雷恐不任我意逆以前我懷舉手長勞勞二情同依依入門上家堂進退無顏儀阿母大拊掌不圖子自歸十三教汝織十四能裁衣十五彈箏篴十六知禮儀十七遣汝嫁謂言無誓違汝今無罪過不迎而自歸蘭芝慙阿母兒實無罪過阿母大悲摧還家十餘日縣令遣媒來云有第三郎窈窕世無雙年始十八九便言多令才阿母謂阿女汝可去應之阿女銜淚答蘭芝初還時府吏見丁寧結誓不別離今日違情義恐此事非奇自可斷來信徐徐更謂之阿母白媒人貧賤有此女始適還家門不堪吏人婦豈合令郎君幸可廣問訊不得便相語媒人去數日尋遣承請還誰有蘭家女承籍有官宦云有第五郎嬌逸未有婚遣丞爲媒人主簿通語言直說太守家有此令郎君既欲結大義故遣來貴門阿母謝媒人女子先有誓老姥豈敢言阿兄得聞之悵然心中煩譽言謂阿妹作計何不量先嫁得府吏後嫁得郎君否泰如天地足以榮汝身不嫁義即體其往欲何云蘭芝仰頭答理實如兄言謝家是夫婿中道還君門處分適兄意那得自任專雖與府吏要渠會未無緣登即相許和便可作婚姻媒人下牀去諾諾復爾爾還部白府君下官奉使命言談大有緣府君得聞之心中大歡喜視歷復開書便利此月內六合正相應良吉三十日今已二十七卿可去成婚交語速裝束絡繹如浮雲青

雀白鵠舫四角龍子幡婀娜隨風轉金車玉作輪躑躅
青驄馬流蘇金縷鞍齎錢三百萬皆用青絲穿雜綵三
百匹交廣市鮭珍從人四五百鬱鬱登郡門阿母謂阿
女適得府君書明日來迎汝何不作衣裳莫令事不舉
阿女默無聲手中掩口啼淚落便如瀉移我琉璃榻出
置前窓下左手持刀尺右手執綾羅朝成繡袂裙晚成
單羅衫掩掩日欲暝愁思出門啼府吏聞此變因求假
暫歸未至二三里摧藏馬悲哀新婦識馬聲躑躅相逢
迎悵然遙相望知事故人來舉手拍馬鞍嗟嘆使心傷
自君別我後人事不可量果不如先願又非君所詳我
有親父母逼迫兼弟兄以我應他人君還何所望府吏
爲新婦賀卿德高遷磐石方可厚可以卒千年蒲葦一
時紉便作且夕間卿當日睽貴吾獨向黃泉新婦謂府
吏何意出此言同是被逼迫君爾妾亦然黃泉不相見
忽違今日言執手分道去各各還家門生人作死別恨
恨那可論念與世間辭千萬不復全府吏還家去上堂
拜阿母今日大風寒寒風摧樹木嚴霜結庭蘭兒今日
冥冥令母在後單故作不良計勿復怨鬼神命如南山
石四體康且直阿母得聞之零淚應聲落汝是大家子
仕宦於臺閣慎勿爲婦死貴賤情何薄東家有賢女窈
窕豔城郭阿母爲汝求便復在旦夕府吏再拜還長嘆
空房中作計乃爾立轉頭向戶裏漸見愁煎迫其日牛
馬嘶新婦入青廬蒼蒼黃昏後寂寂人初定我命絕今
日魂去尸長留攬裙脫絲履舉身赴清池府吏聞此事

心知長別離徘徊庭樹下自掛東南枝兩家求合葬合
葬華山傍東西植松栢左右種梧桐枝枝相復蓋葉葉
相交通中有雙飛鳥自名爲鴛鴦仰頭相向鳴夜夜達
五更行人駐足聽寡婦赴徬徨多謝後世人戒之慎勿
忘

驅車上東門行

驅車上東門遙望郭北墓白楊何蕭蕭松栢夾廣路下
有凍死人杳杳卽長暮潛寐黃泉下千載永不寤浩浩
陰陽移年命如朝露人生忽如寄壽無金石固萬歲更
相送賢聖莫能度服食求神仙多爲藥所誤不如飲美
酒被服紈與素

步出夏門行

邪徑過空廬好人常獨居卒得神仙道上與天相扶過
謁王父母乃在太山隅離天四五里道逢赤松俱攬轡
爲我御將吾上天遊天上何所有歷歷種白榆桂樹夾
道生青龍對伏趺

婦病行

婦病連年累歲傳呼丈人前一言當言未及得言不知
淚下一何翩翩屬累君兩三孤子莫我兒饑且寒有過
慎莫笞笞行當折搖思復念之亂曰抱時無衣襦復無
裏閉門塞牖舍孤兒到市道逢親交泣坐不能起從乞
求與孤買餌對交啼泣淚不可止我欲不傷悲不能已
探懷中錢持授交入門見孤兒啼索其母抱徘徊空舍
中行復爾耳弃置勿復道

孤兒行

孤兒生孤子遇生命獨當苦父母在時乘堅車駕駟馬
父母已去兄嫂令我行賈南到九江東到齊與魯臘月
來歸不敢自言苦頭多磯虱面目多塵大兄言辦飯大
嫂言視馬上高堂行取殿下堂孤兒淚下如雨使我朝
行汲暮得水來歸手爲錯足下無菲愴愴履霜中多疾
藜拔斷蒺藜腸心中愴欲悲淚下漉漉清涕纍纍冬無
複襦夏無單衣居生不樂不如早去下從地下黃泉春
氣動草萌芽三月蠶桑六月收瓜將是瓜車來到還家
瓜車反覆助我者少啗瓜者多願還我帶兄與嫂嚴獨
且急歸當與校計亂日里中一何謊謊願欲寄尺書將
與地下父母兄嫂難與久居

木蘭辭二首

唧唧復唧唧木蘭當戶織不聞機杼聲唯聞女歎息問
女何所思問女何所憶女亦無所思女亦無所憶昨夜
見軍帖可汗大點兵軍書十二卷卷卷有爺名阿爺無
大兒木蘭無長兄願爲市鞍馬從此替爺征東市買駿
馬西市買鞍韉南市買轡頭北市買長鞭旦辭爺娘去
暮宿黃河邊不聞爺娘喚女聲但聞黃河流水鳴濺濺
旦辭黃河去暮至黑山頭不聞爺娘喚女聲但見燕山
胡騎鳴啾啾萬里赴戎機關山度若飛朔氣傳金柝寒
光照鐵衣將軍百戰死壯士十年歸歸來見天子天子
坐明堂策勳十二轉賞賜百千疆可汗問所欲木蘭不
用尚書郎願馳千里足送兒還故鄉爺娘聞女來出郭

相扶將阿姊聞妹來當戶理紅妝小第聞姊來磨刀霍
霍向豬羊開我東閣門坐我西間牀脫我戰時袍著我
舊時裳當窓理雲鬢挂鏡帖花黃出門看火伴火伴皆
驚忙同行十二年不知木蘭是女郎雄兔脚撲朔雌兔
眼迷離雙兔傍地走安能辯我是雄雌

木蘭抱杼嗟借問復爲誰欲聞所慊慊感激疆其顏老
父隸兵藉氣力日衰耗豈足萬里行有子復尚少胡沙
沒馬足朔風裂人膚老人舊羸病何以強自扶木蘭代
父去秣馬備戎行易却紉綺裳洗却鉛粉妝馳馬赴軍
幕慷慨携干將朝屯雪山下暮宿青海傍夜襲月支虜
更携千闐羗將軍得勝歸士卒還故鄉父母見木蘭喜
或悲傷木蘭能承父母顏却御巾鞞理絲簧昔爲烈
士雄今復嬌子容親戚持酒賀父母始知生女與男同
門前舊軍都十年共崎嶇本結兄弟交死戰誓不渝今
也見木蘭言聲雖是顏貌殊驚愕不敢前歎重徒嘻吁
世有臣子心能如木蘭郎忠孝兩不渝千古之名焉可
滅

鴈門太守行

孝和帝在時洛陽令王君本自益州廣漢蜀民少行官
學通五經論明知法令歷世衣冠從溫補洛陽令治行
致賢擁護百姓子養萬民外行猛政內懷慈仁文武備
具料民貧富移惡子姓篇著理端傷殺人比伍同罪對
門禁釐矛八尺布輕薄少年加笞決罪詣馬市論無妄
發賦念在理寬敕吏正獄不得苛煩財用錢三十買繩

禮竿賢哉賢哉我縣王君臣吏衣冠奉使皇帝功曹主簿皆得其人臨部居職不敢行恩青身苦體夙夜勞勤治有能名遠近所聞天年不遂早就奄昏爲君作祠安陽亭西欲令後世莫不稱傳

巾舞歌

吾不見公莫時吾何嬰公來嬰姥時吾哺聲何爲茂時爲來嬰當恩吾明月之士轉起吾何嬰土來嬰轉去吾哺聲何爲土轉南來嬰當去吾城上羊下食草吾何嬰下來吾食草吾哺聲汝何三年針縮何來嬰吾亦老吾平平門淫涕下吾何嬰何來嬰涕下吾哺聲昔結吾馬客來嬰吾當行吾度四州洛四海吾何嬰海何來嬰四海吾哺聲煖西馬頭香來嬰吾各道五治五丈度汲水吾噫邪哺誰當求兒母何意零邪錢徒步哺誰當吾求兒母何吾哺聲三針一發交時還弩心意何零意弩心遙來嬰弩心哺聲復相頭巾意何零何邪相哺頭巾相吾來嬰頭巾母何何吾復來推排意何零相哺推相來嬰推非母何吾復車輪意何零子以邪相哺轉輪吾來嬰轉母何吾使君去時意何零子以邪使君去時使來嬰去時母何吾思君去時意何零子以邪思君去時思來嬰吾去時母何何吾吾

西洲曲

憶梅下西洲折梅寄江北單衫杏子紅雙鬢鷓鴣色西洲在何處兩漿橋頭渡日暮伯勞飛風吹烏舊樹樹下即門前門中路翠鈿開門郎不至出門採紅蓮採蓮南

唐秋蓮花過人頭低頭美蓮子蓮子清如水置蓮懷袖
中蓮花徹底紅憶郎郎不至仰首望飛鴻鴻飛浦西洲
望郎上青樓樓高望不見盡日欄干頭欄干十二曲垂
手明如玉卷簾天自高海水搖空綠海水夢悠悠君愁
我亦愁南風知我意吹夢到西洲

長干曲

逆浪故相邀菱舟不怕搖妾家楊子住便美廣陵潮

廣文選卷第十九

江都葛澗校

廣文選卷第二十

明通議大夫都察院右副都御史大庾劉節廣

詩

樂府三

同聲歌

張平子

邂逅承際會得充君後房情好新交接恐慄若探湯不
才勉自竭賤妾職所當綢繆主中饋奉禮助烝嘗思惟
苑弱席在下蔽匡牀願得羅衾幃在上衛風霜灑掃清
枕席鞞芬以狄香重戶納金局高下華燈光衣解巾粉
御列圖陳枕張素女爲我師儀容盈萬方衆夫所希見
天老教軒皇樂莫思夜樂沒齒焉可忘

董嬌饒

宋子侯